

弘

簡

錄

弘簡錄卷八十

明刑部員外郎仁和弘齋邵經邦學

皇清翰林院侍講學士四世孫遠平校閱

載記 五代晉一

高祖石敬瑭 出帝石重貴

高祖皇帝本出於西陲父臬振雞善騎射自朱邪歸唐徙居陰山從李克用起兵雲朔積戰功至洺州刺史生敬瑭不知得姓石氏之始明宗愛其沈厚寡言妻之以女卽隸帳下號左射軍莊宗已得魏梁將劉鄩急攻清平自馳往救兵未及陣爲鄩所掩敬瑭以十騎橫梁馳擊振取以旋莊宗壯之拊其背手昏以酥以蕃俗最重此禮由是名動軍中從戰胡柳前鋒周德威死獨以左射軍敗梁兵明宗戰胡盧套楊村爲梁所敗脫之於危

魏兵變時明宗欲自歸天子明已不反敬瑋勸以宜速定計豈有軍變於外上將獨可無事願得騎兵先攻冀門天下要害得之可以成事明宗然之與之驍騎三百直渡黎陽明宗遂得入汴莊宗後至不得入兵皆潰散敬瑋趣汜水收其散卒拜爲保義軍節度使賜號竭忠建策典復功臣兼六軍諸衛副使在陝爲政有聲時諸侯多不奉法鄧州阬北亳州李鄴皆以賊汗論死敬瑋獨被詔褒與普州安崇阮洺州張萬進耀州孫岳等俱稱廉吏明宗首舉以諷天下天成二年十月從幸汴州爲御營使改領宣武軍節度侍衛親軍馬步軍都指揮使加賜耀忠匡定保節功臣三年四月徙鎮天雄拜同平章事與唐尹五月又除驛馬都尉董璋反爲東川行營都招討使不克而還會契丹吐渾突厥皆入寇敬瑋亦欲避秦王從榮之禍自請禦之制出

以不樂爲六軍副使復辭行明宗責問大臣范延光趙延壽等  
卒以敬瑭爲請拜河東節度使大同彰國振武威塞等軍蕃漢  
馬步軍總管以行屯于忻州兵士忽擁馬首呼萬歲敬瑭懼斬  
三十人而後止愍帝卽位加中書令徙鎮成德清泰元年五月  
復鎮太原先與廢帝俱事明宗心不相悅廢帝立不得已來朝  
心頗自疑欲求歸鎮難以爲言乃陽爲羸疾灼艾滿身帝憐遣  
暹時分重亂爲皇城副使與公主母曹太后伺帝動靜言語以  
報益見危懼每帝遣使勞軍卽稱疾求解總管以探帝心而帝  
母魏氏墓在太原有司議立寢宮敬瑭言陵與民冢墓相雜不  
可立帝疑敬瑭欲毀民墓爲國山此發怒議罷總管徙鎮鄆州  
不受命因謂其屬先帝授吾太原使老今無故而遷是疑吾反  
也且太原地險粟多吾當內撤諸鎮外求強援桑維翰劉知遠

等勸之乃上表論帝非明宗子不當立而許王從益以次當嗣  
帝覽表大怒手壞投之地名學士馬胤孫草詔削奪官爵詆以  
惡語命張敬達等討之敬瑄求援於契丹九月耶律德光入鴈  
門與唐兵戰敬達大敗敬瑄夜出北門兄德光約爲父子以清  
泰三年十一月丁酉卽皇帝位國號晉賂契丹以幽涿薊檀順  
遼漢蘇朔雲應新媯儒武寰等十六州己亥大赦改是年爲天  
福元年拜桑維翰知樞密使事閏月丙寅趙瑩爲門下侍郎維  
翰中書侍郎並同平章事兼樞密使時廢帝尚在趙德鈞及其  
子延壽叛降契丹鏖之以歸己卯次河陽節度使葛從誨來降  
辛巳入京甲申大赦十二月乙酉如河陽追降廢帝爲庶人丁  
亥馮道兼門下侍郎同平章事己丑曹州指揮使石重立殺其  
刺史鄭玩辛卯宋直言癸巳鎮州都虞候祕瑄逐節度副使李

彥琦同州裨將門鐸殺其將楊漢賓庚子天平節度王建立殺副使李彥贊是歲旱

天福二年正月丁卯天雄軍節度范延光殺齊州防禦使祕瑁戊寅李崧爲中書侍郎同平章事兼樞密使封唐宗室子爲公及隋鄴公爲二王後以周介公備三恪二月丁酉契丹使其太子解里來三月甲辰如汴州有司請尊帝庶母劉氏帝以宗廟未立謙讓不追四月丁亥赦囚蜀民租賦遣趙瑩使于契丹辛卯宣武軍節度使楊光遠進助國錢契丹使宮苑使李可興來五月壬戌求直言丁丑追尊四代爲皇帝妣皆皇后高祖景諡孝安廟號靖祖妣秦氏諡元曾祖栢諡孝簡廟號肅祖妣安氏諡恭祖昱諡孝平廟號睿祖妣來氏諡獻考紹雅諡孝元廟號獻祖妣何氏諡懿六月癸未契丹使夸離畢來丁酉范廷光反

命都部署楊光遠討之張從賓反留守判官李遐死之命奉國  
都指揮使侯益護聖都指揮使杜重威討之從賓寇河陽又寇  
河南七月陷汜水關殺巡檢使宋廷浩婁繼英叛降于從賓辛  
酉重威克汜水關從賓投河死餘黨救之壬申光遠克博州八  
月丙申靜難軍節度使安叔千進添都馬乙巳赦非死罪囚九  
月光遠進粟十月辛巳禁造甲兵 三年二月戊戌諸鎮進物  
助國三月丁丑禁私造銅器七月辛酉以皇業錢作受命寶八  
月戊寅馮道及劉昫爲契丹冊禮使丙戌許御署官選巳丑獨  
水旱民稅辛丑歸伶官于契丹九月巳酉赦范延光巳未歸靜  
鞭官劉守威金吾勘契官王殷司天鷄叫學生殷暉于契丹巳  
巳赦魏州民稅十月戊寅契丹使中書令韓頰奉冊曰英武明  
義皇帝庚辰升汴州爲東京以洛陽爲西京雍州爲晉昌軍戊

子右金吾衛大將軍馬從斌使于契丹已未契丹使梅里來戊戌大赦十一月辛亥升廣晉府爲鄴都壬戌除鑄錢令 四年

正月盜發唐愍帝墓辛亥以張從恩爲樞密副使二月丙辰頒調元曆靈州戍將王彥忠以懷遠城反尋降供奉官齊延祥殺之四月甲申廢樞密使八月己亥朔河決博平西戎寇涇州彰義軍節度使張彥澤敗之執其首領野離羅蝦獨九月丁丑契丹使枯木孤來十一月乙亥立唐高祖太宗莊宗明宗愍帝廟

于西京戊子契丹使還折來 五年正月丁卯朔德音除民公

私債負己丑回鶻使海石金來四月甲子契丹興化王來八月

丁酉闕稼于西郊九月丁卯和凝爲中書侍郎同平章事辛巳

闕稼于沙臺十月丁未契丹使舍利來十一月丙子冬至始用

二舞 六年正月戊寅封唐叔虞爲典安王臺駘爲昌寧公二



月戊申停買宴錢三月除民二年至四年以前稅四月己未契丹使述括來八月壬辰如鄴都宣徽南院使張從恩爲東京內外兵馬都監壬寅大赦甲寅光祿卿張澄使于契丹九月丁丑河決中都入于沓河十月河決滑濮郟澶州安從進反十一月丁丑命討之十二月先鋒都指揮郭海金及從進戰于唐州敗之安重榮反命杜重威往討戊戌戰于宗城敗之是歲吐渾使白承福白可久突厥使薛同游并契丹使皆來 七年正月追封兄敬儒金紫光祿大夫檢校尚書左僕射兼御史大夫上柱國贈太傅丁巳克鎮州安重榮伏誅赦廣晉庚午契丹使達刺來三月歸德軍節度使安彥威塞決河于滑州閏月蝗食麥五月帝有疾乙巳尊皇太妃劉氏爲太后六月丙辰吐渾使念醜漢來乙丑帝崩于寶昌殿年五十二諡曰聖文章武孝皇帝廟

號高祖

出帝名重貴父敬儒唐太宗騎將早卒高祖以爲己子而所生  
六子五皆夭重睿方幼故立重貴爲人自少謹厚善騎射高祖  
使博士王震教以禮記卽位拜金紫光祿大夫行太原尹北京  
留守知河東節度事天福二年九月召拜左金吾衛大將軍三  
年冬爲開封尹封鄴王加太尉同中書門下平章事六年改東  
京留守十二月爲廣晉尹徙王齊帝崩卽位愨前尊契丹耶律  
德光爲祖庚午使右驍衛將軍石德超以御馬二撲祭于相州  
之西山帝貪嘗聲色居喪中悅重亂妻馮氏用六宮仗衛太常  
鼓吹納以爲后丙子宰相馮道爲山陵使竇貞固副之太常卿  
崔稅禮讓使戶部侍郎呂琦爲南簿使中丞王易簡爲儀仗使  
七月壬辰皇祖母劉氏崩輟視朝三日庚子大赦八月戊午高

行周克襄州安從進自焚死庚申天平軍景延廣義成軍李守  
貞彰德軍郭謹進錢粟助作山陵庚午葬皇祖母於魏縣九月  
辛卯李守貞爲山陵都部署十一月庚寅葬顯陵在河南  
壽安縣庚子  
禱神至于太廟辛丑蜀靈居所過民租之半十二月庚午北京  
留守劉知遠進百頭穹廬是歲旱蝗

八年三月己未如東京赦廣晉府囚庚申次澶州赦囚庚午寒  
食望祭顯陵于南莊焚御衣紙錢三月己卯朔趙瑩罷以桑維  
翰爲侍中辛丑蝗四月庚午募民捕蝗易之以粟丁亥追封皇  
伯敬儒爲宋王贈太師癸卯馮道罷甲辰旱大赦六月庚戌祭  
蝗于臯門辛未括借民粟但藏者殺七月甲午冊皇太后丁酉  
射于南莊辛亥檢民青苗九月戊寅尊奉國夫人安氏爲皇太  
妃十月戊申冊皇后馮氏壬子改于沙臺十一月甲申幸八角

閱馬牧戍戍齊州刺史楊承祚奔于青州十二月甲寅楊光遠  
反淄州刺史翟宗死之

冊曰天縱亂離一本千岐父變為伯種易而篡天性不親  
無祖無禰弁髦其君若胥若靡聚訟無窮作備一時

開運元年大饑正月甲戌朔契丹寇滄州己卯陷貝州庚辰入  
鴈門寇代州以高行周為北面行營都部署以禦之辛巳殿直  
王班使于契丹至鄴都不得進而復壬午前靜難軍節度使李  
同留守東京乙酉北征以景延廣為御營使丙戌契丹寇黎陽  
辛卯講武于澶州詔括馬壬辰契丹屯于元城癸巳趙延壽寇  
南樂甲午括馬辛丑博州刺史周儒叛降于契丹二月戊申李  
守貞及契丹戰于馬家渡癸丑馬全節又戰于北平咸敗之三  
月癸酉戰于戚城契丹遁去己丑冀州刺史白從暉敗契丹于

衡水癸巳籍民爲武定軍四月契丹陷德州沿河遷檢使梁進  
敗之取德州甲寅還京赦辛酉幸借民財五月丁亥鄴都留守  
張從恩爲貝州行營都部署辛卯李守貞爲青州行營都部署  
討楊光遠六月克淄州丙午復置樞密使以桑維翰充之丙辰  
河決滑州環梁山入于汶濟七月辛未朔大赦改元巳丑劉昫  
兼門下侍郎同平章事八月戊辰旌表陳州項城民史仁諷門  
閭九月丙子契丹寇遂城樂壽代州刺史白文珂戰于七里烽  
敗之十二月巳亥朔射兔于臯門丁巳楊承勳囚其父光遠以  
降殺之閏月乙酉德音赦青州囚契丹寇恒州二年正月契  
丹陷秦州壬子馬全節及契丹戰于榆林兩軍皆潰戊午張從  
恩留守東都辛酉高行周爲御營使乙丑北征契丹去二月巳  
巳幸黎陽橫海軍節度使田武爲東北面行營都部署以備契

丹丙子大閱于戚城丙戌閱馬於鐵丘三月戊戌契丹陷祁州  
刺史沈斌死之庚戌馮全節克泰州辛亥易州戌將孫方諫及  
契丹諸里戢于狼山敗之四月戊寅勞師于戚城己卯又勞師  
于王莽河甲申還京赦左右軍囚庚寅大賞軍功五月丙申朔  
大赦六月旱丁卯射于繁臺幸杜重威第八月甲子朔廢二舞  
丙寅和凝罷馮玉爲中書侍郎同平章事辛未閱馬于茂澤陂  
丁丑括馬九月己亥閱馬于萬龍岡幸李守貞第十月戊子高  
麗使其廣訶侍郎韓玄珪兵部侍郎劉崇規禮賓卿金廉內軍  
卿朴燕言來十一月戊戌封王武爲高麗國王十二月丁亥桑  
維翰罷以趙瑩爲中書令李崧守侍中樞密使是歲兩幸南莊  
又幸泚臺畋于戚城并北郊射兔于硯臺及皋門 三年二月  
丙子回鶻使突厥陸來壬午射鴨于板橋幸南莊六月孫方諫

以狼山附于契丹丙寅契丹寇邊已丑李守貞爲行營都部署  
義成軍節度使皇甫遇爲副河決漁池大饑羣盜起七月大雨  
水河決楊劉朝城武德八月辛酉河溢歷亭九月河決澶滑懷  
州辛丑行營馬軍排陣使張彥澤及契丹戰于新興敗之癸卯  
劉知遠又敗契丹于朔州大雨霖河決臨潢十月河決衛州丙  
寅河決原武十一月永靜軍節度使梁漢璋及契丹戰于瀛州  
敗績契丹寇鎮定十二月壬戌奉國都指揮使王清及契丹戰  
于滹沱敗績死之杜重威李守貞張彥澤以其軍叛降于契丹  
壬申契丹滅晉

載記 五代晉二

高祖后李氏

安太妃

出帝后馮氏

高祖叔

萬支  
萬全

兄敬威

敬威  
敬暉

子重信

重義  
重杲

重胤

孫廷煦

廷賢

高祖后李氏唐明宗女初封永寧公主清泰二年進魏國長公主三年自太原來朝千春節辭歸廢帝常疑高祖必反留之不得辭語曰爾歸何速欲與石耶反耶醒後左右告之帝大悔公主歸以語益不自安卽位間爲皇后出帝立尊爲皇太后爲人彊傲高祖常嚴憚之開運三年十二月太后與帝問耶律德光遣張彥澤犯京師皆欲自焚嬖臣薛超勸止之德光以書遺太后曰吾有梳頭妮子竊一藥囊奔晉吾戰陽城時亡奚車一乘今皆在否又問契丹先爲晉獲者景延廣桑維翰等所在帝得此書名當直學士范質謂曰杜耶一何相負昔先帝起太原欲擇一子留守謀之北朝皇帝以我相屬我素爲其所知卿爲我草奏具言之庶幾活我子母質爲帝草降表次又爲太后表遣孫延煦延寶奉以請罪德光報曰可無憂管取一喫飯處次年



正月德光入京師帝與太后肩輿至郊外德光不見曰天無二日豈有兩天子相見於道路耶乃拘于封禪寺遣將崔延勳以兵守之時雨雲寒凍皆苦饑使人謂寺僧吾嘗於此飯僧數萬今日豈不相憫僧辭以鹵意難測不敢又陰祈守者乃稍得食復求酒於監者李筠筠曰臣家有酒非敢吝慮陛下有不測故不敢進帝姑烏氏公主私賂守者得入與訣歸第自經德光降帝爲負義侯遷黃龍府使人諭太后吾聞重貴不從母教以至于此可求自便勿與俱行答曰重貴事妾甚謹所失者違先君之志絕兩國之歡幸蒙大惠全生保家母不隨子欲何所歸於是二后并重睿延煦延寶等舉族從帝而北從以宮女五十宦官三十東西班五十醫官一控鶴官四御厨七茶酒司三儀鸞司三衛以六軍士二十騎兵三百所經州縣皆故將吏有所供

飯悉不得道路旁父老亦持牛酒爲獻衛兵擁盾不使見帝皆  
涕泣而去自幽州行十餘日過平州出榆關行砂磧中餓不得  
食遣宮女從官採木實野蔬充之又行七八日至錦州商人迫  
帝與后拜阿保機畫像不勝其辱泣呼曰薛超誤我不令我死  
又行五六日過海北州至東丹王墓遣延煦拜之又行十餘日  
渡遼水至渤海國鐵州又行七八日過南海纔至黃龍府是歲  
六月契丹國母徙帝后于懷密州去黃龍西北一千五百里過  
遼陽二百里未幾國母爲永康王所囚王遣帝后還止遼陽稍  
供給之明年四月王至遼陽帝白衣紗帽與二后謁帳中王止  
以常服見伏地雨泣自陳過咎王使人扶起與坐飲酒奏樂帳  
下伶人從官望見故主皆泣下悲不自勝爭以衣服藥餌爲遺  
五月王上厓避暑取宦者并東西班各十五人及皇子延煦而

去王妻兄禪奴愛帝小女求之帝辭以尚幼王馳一騎取之以  
賜禪奴至八月下陘太后自馳至朔州見王求於漢兒城側賜  
地種牧爲生從行十餘日道與延煦俱還漢乾祐二年徙帝及  
太后于建州自遼陽東南行千二百里節度使趙延暉避正寢  
以館之去建州數十里外得地二十餘頃帝遣從行者耕而食  
之次年三月太后寢疾無醫藥仰天而泣南望戟手罵杜重威  
李守貞等八月卒帝與皇后宮人宦者東西班皆被髮徒跣扶  
柩至賜地焚其骨穿地而葬焉周顯德中有中國人自契丹亡  
歸言見帝與皇后諸子皆無恙後不知所終

出帝母安太妃代州崞縣人初封秦國夫人卽位尊爲皇太妃  
老而失明從帝北遷徙建州卒于道中毀奚車而焚之載其燼  
骨與李太后并葬之后馮氏定州人父濠爲州進奏吏以巧

佞爲安重誨所喜使佐高祖爲鄴都副留守相得懽甚乃爲重  
亂娶濛女後封吳國夫人重亂早卒后寡居有邑出帝悅之假  
以皇太后命納之駕至西御莊見高祖影殿羣臣皆賀帝喜顧  
謂馮道等曰朕與卿等不任大慶復過梓宮前醜而告曰皇太  
后之命與先帝不任大慶左右皆失笑帝亦絕倒又顧左右我  
今日作新婦何似皇后與左右復大笑聲聞于外后既立與帝  
酣飲歌舞獨專內寵封拜官官尚宮知客等皆爲郡夫人又用  
男子李彥弼爲皇后宮都押衙其兄玉執政內外用事李太后  
數加訓戒不從故契丹暴帝惡有曰納叔母於宮中亂人倫之  
大典既隨北遷祥帝受辱數求壽藥與俱飲竟不可得後不知  
所終

高祖叔萬友生敬威敬贊萬銓生敬暉而敬德敬殷重亂皆不

如其親踈高祖愛重亂養以爲子故名下齒諸子未卽位前叔  
兄與弟敬殷子重進皆卒敬威字奉信唐廢帝時爲彰聖右第  
三都指揮使領常州刺史舉兵時語人曰。生而有死。人孰能免。  
吾兄方舉大事。吾不可偷生取辱。見笑一時。遂自殺。敬德時爲  
沂州馬步軍指揮使。以反誅。天福二年正月。萬友自故金紫光  
祿大夫檢校司徒兼御史大夫上柱國贈大師與萬銓黜階相  
同。惟檢校司空贈太傅各異。敬威敬德敬殷各贈太傅。七年正  
月。追封敬威廣王。敬德福王。敬殷通王。皆加贈太尉。八年五月  
追封萬友秦王。萬銓趙王。加贈太師。敬贇字德和。少無賴。竄  
身民間。高祖使人求得之。補太原牙將。卽位累飛龍皇城二使。  
遷曹州防禦使。天福五年冬。拜河陽三城節度使。以性貪暴。爲  
擇賢佐輔之。亦憚高祖法嚴。未嘗敢犯。歲餘徙鎮保義。出帝加

同中書門下平章事始漸驕恣陝人苦其暴虐召還京師斥都  
押衙蘇彥存鄭溫遇以警之契丹犯邊從幸澶淵使以兵備汝  
陽守麻家渡未嘗見敵皆無功開運元年七月復出爲威勝軍  
節度使歲餘建曹州爲威信軍授節度使在鎮貪暴尤甚久之  
召還張彥澤入京夜走踰城溺死時年四十九 敬瑛字德昭  
爲人厚重剛直勇而多智高祖尤愛之命爲曹州防禦使以廉  
儉稱卒于官贈太傅加贈太師追封韓王子賤嗣

高祖諸子惟重信李皇后所生餘皆不知其母重英爲右衛將  
軍重胤皇城副使重進左金吾將軍高祖起兵重英重胤匿民  
家井中捕得誅之并族民家天福二年正月爲二子發哀與重  
進皆贈太保 重信字守孚爲人敏悟多智而好禮天福二年  
二月以左驍衛上將軍拜河陽三城節度使有善政高祖下詔

襄之范延光反見殺年二十贈太尉 重義字弘理爲人好學  
頗知兵法卽位拜左驍衛大將軍幸汴州爲東都留守張從賓  
反見殺年十九贈太傅天福七年正月追封重英號王重胤鄭  
王重進夔王俱加太傅重信楚王重義壽王加太尉天福八年  
俱重加太師皆無子 重睿爲人貌類高祖臥病時尚幼宰相  
馮道入見臥內呼出使拜因以宦者抱持寘道懷中時雖不言  
左右皆知其以重睿託道也及崩晉大臣以國家多事議立長  
君而景延廣已陰許立出帝重睿遂不得立非爲檢校太保開  
封尹以左散騎常侍邊蔚權知開封府事開運二年五月授雄  
武軍節度使歲餘徙鎮忠武皆不之鎮 重杲高祖幼子小字  
馮六未名而卒贈太傅追封陳王賜名重杲天福八年加贈太

師

延煦延寶高祖諸孫出帝以爲子開運二年秋授延煦鄆州刺史少不能視事從以一宦者又遷尚書郎路航叅知州事宜者遂專政每詬辱航出帝召航還已而徙齊州防禦使三年拜鎮寧軍節度使是時河北用兵天下旱蝗民皆餓死諸鎮爭爲聚斂趙在禮所積尤多帝利其貲遣宗正卿石光贊以幣一百五十床聘其女迎于其第宴在禮萬歲殿賜予甚厚君臣窮極奢侈一婚其費千萬十一月徙鎮保義而延寶代爲鄆州刺史轉威信軍節度使遣寶降表玉璽金印以歸契丹契丹得璽以爲製作非工與前史所傳者異命延煦等還求其璽時因從珂自焚於洛陽舊璽不知所在晉祖受命命工製此璽契丹知狀乃已後與重睿俱北遷不知所終

載記 五代晉三



桑維翰

景延廣

馬全節

子今

高行周

父思繼  
兄行珪

劉處讓

杜重威

李守貞

扈彥珂

張彥澤

皇甫遇

桑維翰字國僑河南人生而狀貌怪異身短面長臨鑑自奇七尺之身不如一尺之面素有志於公輔初舉進士主司惡其姓勸以不必應舉可從他求仕維翰慨然著日出扶桑賦以見志自鑄鐵硯磨穿則改遂及第辟晉高祖河陽掌書記常隨用兵贊成異謀因使爲書求援於契丹凡滅唐興晉皆其力也卽位拜翰林學士禮部侍郎知樞密院事遷中書侍郎同平章事兼樞密使天福四年出爲相州節度使歲餘徙鎮秦寧吐渾白永福屬役契丹苦其暴虐附鎮州安重榮以歸晉請與契丹絕好用吐渾以攻之高祖重遣其意未決維翰力言契丹未可與爭

疏七上上名至臥內語曰北面之事方掩吾胸中得卿此疏計已決矣可無憂也又勅上幸鄴都七年來朝徒鎮晉昌出帝卽位名拜侍中忠景延廣用事與契丹絕盟言不能入陰使人說帝制契丹安天下非用維翰不可乃出延廣於河南拜維翰中書令復爲樞密使封魏國公事無巨細一以委之數月之間百度寔理先是高祖惡李翰好佚浮薄詔廢翰林學士按唐六典歸其職於中書舍人而端明殿樞密院學士亦廢維翰奏皆復之四方畏其權勢將遣巨萬歲積不貲內客省使李彥韜與馮玉共肆讒毀帝欲黜之劉昫李崧皆謂不可然自是日益見疎帝過飲得疾陰遣人白太后請爲皇弟重睿置師傅帝愈頗知之遂怒罷爲開封尹遂自稱足疾稀復朝見契丹屯中度破藥城杜重威等大軍圍絕國事已急求見馮玉等計事謀復不合

又求見帝以方調鷹苑中不服退而歎曰晉不血食矣自晉與契丹盟始成於維翰而終敗於延廣耶律德光凡所書檄未嘗不以此兩人爲言欲使維翰先來而帝囚前言毋絕契丹中心愧不欲使見德光囚諷張彥澤圖之維翰素以威嚴自持平時老將大臣見者無不屈服彥澤雖驍悍自矜每往候之冬月未嘗不流汗及是利其貲產將爲不利左右勸維翰以避禍答曰國亡至此安所避死遂坐府中不動彥澤至厲聲語曰吾晉大臣自當死國安得無禮耶彥澤股栗不敢仰視退而語人吾不知桑維翰何如人今日猶使人恐懼如此乃以帝命召之赴侍衛司獄行遇李崧顧曰相公當國使維翰獨死崧慙不能對彥澤使人縊殺之德光曰我本無心殺維翰何必至此命以尸賜其家而貲財悉爲彥澤所掠

景延廣字航川陝人以挽強見稱父建教以弟不入鐵不如不  
發初事梁邵王友誨以及被幽亡去從王彥章戰中都身被數  
創得免又坐朱守殷當誅晉祖惜其才陰縱使亡明宗時爲客  
將卽位授侍衛步軍都指揮領果州團練寧江軍節度使後歷  
義成保義河陽天平四鎮復召爲侍衛馬步軍都虞候遷都指  
揮使出帝之立延廣有力頗伐其功自是號令征伐一出於已  
晉大臣皆不得與高祖崩議告契丹當上表稱臣延廣獨不肯  
但致書稱孫契丹怒遣使者喬瑩責晉語以先皇帝北朝所立  
故稱臣今天子中國自冊可以爲孫而不可爲臣今晉有橫磨  
大劍十萬口翁要戰則來他日不禁孫子取笑天下瑩知其言  
必爲起禍之端懼後無以取信請載于紙以備遺忘因敕吏具  
載以授瑩歸具告其主蓋怒天福八年秋帝幸大年莊還置酒

延廣第進器服鞍馬茶牀椅榻皆累金銀飾以龍鳳又進帛五千匹綿一千四百兩馬二十二匹玉鞍衣襲犀玉金帶等請賜從官自皇弟重睿下至侍食刺史從者各有差帝亦賜延廣及其母妻從事押衙孔目官等稱是時天下旱蝗民悉餓死以方握親兵恃功恣橫君臣窮極奢侈以相誇尚明年春契丹大入呼曰延廣喚我來何不速戰相距遼魏之間先鋒石公霸遇鹵於戚城高行周符彥卿兵少不能救馳騎急請益兵諸將由其節制皆按兵不動三將被圍數重帝自御軍救之然後得出皆泣訴然諸將皆奮死力戰而延廣未嘗見敵契丹去始出爲河南尹西京留守自居洛陽鬱鬱不得志見晉口削度必不支乃爲長夜之飲大治第宅園池妓樂惟意所適明年駕幸澶淵復以延廣從皆無功帝方追悔遣供奉官張暉奉表稱臣契丹以

求和德光報使因延廣來并割鎮定與我方許晉知其不可亦止使引兵屯河陽聞契丹至中渡杜重威降乃還德光行至相州遣騎數千渡河趨洛以取延廣戒曰縱使南奔吳西走蜀必追而取之延廣顧慮其家未能引決遡騎奄至併與從事聞丕被擒馳見德光於封丘責以南北失權皆因爾名喬瑩質其前言初不服瑩出所藏書乃服因責以十事每一事投一牙籌至八籌以而伏地不能仰視叱而鎖之北行至陳橋止民家夜分伺守者怠引手扼吭而死時年五十六

馬全節字大雅元城人唐同光中爲捉生指揮使趙在禮反以領馬步軍明宗卽位歷博單郢沂四州刺史金州防禦使廢帝時蜀人攻金州州兵寡弱至散家財募士卒相與堅守蜀人去名以爲滄州留後歸晉拜橫海軍節度使俄代李金全鎮安遠

金全叛使與安審暉發兵三萬討之與李昇將李承裕戰于安州城南斬首三千級生擒千餘人迫至雲夢執之將獻于朝承裕曰吾掠城中計得百萬皆爲將軍取若見天子必訴此而後就刑全節懼因殺承裕高祖不問徙鎮貽義并安國從杜重威討安重榮以功復徙義武自出帝與契丹交惡全節未常不在兵間開運元年復爲北面行營都處候契丹與晉大軍相拒澶魏之間全節別攻破白團城掠七百人又克秦州獲二千人降其守將晉廷謙契丹敗于戚城引兵分道而北全節敗之于定豐執其將安暉徙廣晉尹鄴都留守爲重威招討副使大敗契丹于衛村二年徙鎮順國未至而卒年五十五贈中書令爲人謙謹事母孝其臨政決事必問法如何居家嘗衣白襦以謁縣令州里多之 子令琮從父署牙內都指揮使歷檢校尚書左

僕射領勤州刺史平安州及安重榮皆有功父卒起復隰州刺史歸漢爲西京巡檢使周祖改陳州刺史征兗州爲京城四門外廵檢世宗移隄州顯德二年入爲虎捷左第十軍都指揮使六年兼領建州刺史宋祖禪位出刺懷州征李筠日夜儲蓄以俟王師及升懷州爲團練命以充使旋爲先鋒都指揮使澤潞平改昭義兵馬鈐轄卒年三十九太祖甚憐之錄其子廷恩爲殿直

高行周字尚質虢州人世爲懷戎戍將父思繼與弟皆以武勇雄於北邊事幽州節度李匡威遇匡儻篡晉王將討其亂遣人招思繼并弟以爲前鋒匡儻棄城走劉仁恭守幽州以其兄弟爲前後中三軍都指揮使分掌燕兵晉留千人以衛仁恭後多犯法思繼等殺之由是晉誅高氏三人時行周年十餘歲仁恭



收之帳下而以其從子行珪爲牙將及守光囚仁恭拜行珪武州刺史其將元行欽素憚之守光背晉晉兵來攻行欽方牧馬山後聞變赴援中道麾下兵叛推行欽爲幽州留後兵過武州執行珪子繁以招行珪當從我行往取守光不然且殺其子行珪不從行欽以兵圍之行周時在圍中卽夜縋城馳見莊宗莊宗遣救比至兵已解去乃與行珪俱降晉行珪歷朔忻嵐三州刺史大同軍節度使明宗時徙威勝安遠二軍卒于鎮贈太尉爲人性貪鄙所爲多不法副使范延策素剛直數陳規諫行珪不聽反啣之已而戍兵欲劫庫兵爲叛行珪先覺潛徙庫兵于他所戍兵無所得乃潰行珪追殺之因誣奏延策同反并其子皆見殺天下斂之行周初諫明宗帳下爲裨將趙德鈞識之曰此子貌厚而小心他日必大貴宜善待之莊宗與梁俱軍河上

道明宗東襲鄆以行周將前軍夜行遇雨鄆不爲備軍中皆欲  
止行周以爲天贊我宜出其不意卽夜馳涉濟入其城鄆人方  
覺遂取之以功歷端絳二州刺史從明宗平朱守殷克王都遷  
潁州團練鎮武軍節度使歷彰武昭義二鎮歸晉爲西京留守  
徙鎮天雄又爲襄州行營南面軍前都部署討不安從進徙鎮  
歸德出帝時代景延廣爲侍衛親軍都指揮使長李彥韜馮玉  
用事求歸鎮契丹亂後許王從益遣人名行周將以拒漢奧曰  
衰世難輔矧叢亂乎不從漢祖入京加守中書令徙鎮天平封  
臨清王周祖加封齊王卒贈尚書令追封秦王子慎德

劉處讓字德謙滄州人少爲張萬進親吏萬進入梁領泰寧節  
度以爲牙將後叛梁附晉梁遣劉鄩討之萬進遣處讓求救于  
晉晉王方與梁相距未能出兵讓於軍門截耳訴曰萬進所以

見國者以附晉故也。奈何不顧其急，願請先死。晉王壯之曰：「義士爲之發兵，未渡河而萬進爲梁兵所敗，因留事晉。莊宗卽位，爲客省使，遣使四方，多稱旨。天成中，遷引進使，左驍衛大將軍。廢帝時，魏州逐劉延皓，從招討范延光爲河北都轉運使，晉高祖時，歷宣徽南院使，延光反，命參楊光遠招討，使軍事已而副招討張從賓又叛，處讓分兵擊破之，還與光遠攻鄴，延光欲降，意尚遲疑，處讓入城，譬以禍福，延光乃出降。時晉重兵悉在光遠，掌檄舉動，驕恣，凡所求請，高祖多戮抑之。處讓言此非上意，皆維翰、李崧、嫉公耳。光遠怒，及兵罷，見高祖，訴其事，不得已罷維翰等，以處讓爲樞密使，在職凡所陳述，多不稱旨。由是遂廢樞密之職，以其印付中書。處讓母憂起復，彰德軍節度使右金吾衛上將軍以疾卒。年六十三，贈太師。」

杜重威朔州人尚高祖女弟拜舒州刺史典禁兵從侯益破張從賓以功拜潞州節度使從高祖降范延光徙忠武加同平章事又領天平遷侍衛親軍都指揮使逆戰安重榮于宗城敵爲偃月陣擊之不動重威欲少却以伺偏將王重胤請分兵爲三重威先以左右隊擊其兩翼伺戰酣重胤以精兵擊其中軍遂大敗之論功卽拜成德軍節度使重威本起武卒貪餽無行又寡將畧悉取府庫所積與重榮之貲皆沒之家高祖知而不問後出帝與契丹絕好連歲入寇悉閉城自守屬邑多爲屠戮其民千萬迴城下登城望見不敢出救開運元年加北而行營招討使明年與李守貞下秦州破滿遂二城殺二千餘人契丹已去至古北還兵擊之重威等南走至陽城爲賊所圍會符彥卿張彥澤等因大風奮擊契丹大潰諸將欲追之重威遽收兵

馳歸在鎮州重歛其民戶口彫敝仍懼契丹之至連表乞還京師拜鄴都留守其所留鎮州私粟尚十餘萬斛殿中監王欽祚和市以爲軍儲仍奏給絹數萬匹重威大怒曰吾非反者安得籍沒耶三年秋契丹高牟翰詐以瀛州降復拜行營招討使是秋大水霖雨六十餘日餓殍盈路居民折屋供饑剝糶秣馬兵行泥潦中調發供饋遠近愁苦甫至瀛州牟翰已棄城去退屯武彊契丹寇鎮定又西趨中渡橋與賊夾滹沱河而軍偏將宋彥筠王清渡河力戰重威按軍不救彥筠遂敗清戰死轉運使李穀教以三脚木爲橋募敢死士過河擊賊不許遂蓄異志契丹遣騎兵夜益西山擊樂城以斷軍後乃陰遣人送款請降契丹大悅許立以爲帝而部下尚未知乃伏甲士齎之諸將愕然聽命軍士解甲大哭聲動原野契丹拜爲太傅賜以赭袍使衣

以示諸軍及犯京師重威以降兵屯陳橋士卒饑凍不勝其苦市人隨路詬罵皆俛首不顧會方率錢帛賞士雖將相不免重威當率萬緡訴曰臣以晉軍十萬降乃獨不免率乎契丹笑其無耻免之遣還鄴都晉亡漢高祖入立拜太尉歸德軍節度使懼不受命高祖遣高行周攻之不克詔給事中陳同招之亦不聽乃自將圍之百餘日城中食盡居民屑趨而食皆無人色多踰城出降始遣判官王敏及其妻子相次請降高祖赦之拜檢校太師守太傅兼中書令悉誅璉及將吏歸京師高祖病甚顧大臣善防重威崩時秘不發喪謀共誅之及三子弘璋弘察弘璉皆尸於市支裂踐踏斯須而盡

李守貞河陽人初爲客將從晉高祖卽位拜客省使監馬全節軍破李金全於安州以功拜宣徽使出帝時領義成軍節度使

爲侍衛親軍都虞候時楊光遠反名契丹入寇從出帝幸澶州麻苔以奇兵入鄆州渡馬家口柵於河東守貞馳往破之溺死契丹兵獲馬數百匹裨將七十餘人徙領秦寧軍引兵二萬討降光遠其故吏宋顏悉取寶貨名姬善馬來獻守貞德之陰置麾下桑維翰名捕甚急詔取顏殺之守貞大怒乃與維翰有隙賊平以功拜同平章事賜以光遠舊第因并取旁近官民舍大治之出帝臨幸燕錫恩禮出於諸將契丹入寇使監杜重威軍晉兵素驕二人爲將復無節度行營所至居民燬圉一空至於草木皆盡其始發軍有掛甲錢及班師又有卸甲錢出入之費常不下三十萬由此公私重困還爲侍衛親軍都指揮使連領天平歸德軍節度使時趙延壽詐言思歸出帝遣人以書招之願得晉兵爲應大臣皆言重威不忠有怨望之心不可用將用

守貞而重威居常待守貞甚厚故守貞請與俱北至卽俱降契丹授以司徒令鎮天平軍未幾漢高祖起守貞來朝拜太保河中節度使高祖崩重威又死守貞懼不自安其門下僧總倫詭有異相非常目漢室新造帝方立天下可圖乃決計謀反適京兆趙思綰遣人遺以黃衣遂大喜以爲天人協應乃發兵西據潼關招誘草寇所在竊發漢遣白文珂常思等出軍擊之已而王景崇與思綰俱反遣人推守貞爲秦王韓授景崇等官爵遣人間賫蠟書遺吳蜀契丹使出兵以牽漢文珂等久而無功隱帝遣樞密使郭威率禁兵督攻之諸將皆請先擊思綰景崇威計未知所向行至華州節度使扈彥珂言三叛連衡以守貞爲主守貞敗則二叛可傳聲而破矣若捨近圖遠使貞出兵于後思綰景崇拒戰于前勝負未決威以爲然乃先擊守貞馮道又



教以率諸將分爲三柵以遲久困之總倫尙云王當有天下以  
分野方災俟殺人垂盡則事可濟守貞信之名將吏大飲指畫  
虎圖曰吾有天命者中其掌引弓一發中之將吏皆拜賀益以  
自負及城破與妻子自焚漢軍入城於煙燼中斬其首傳送京  
師梟於南市其餘黨皆殛之 彥珂代州鴈門人性謹厚晉天  
福中潞州王建立薦補河東節府左都押衙漢祖建號擢宣徽  
南院使授鎮國軍節度華商等州觀察處置等使河中平以功  
遷護國軍節度廣順初就加同平章事移鎮滑州世宗投左衛  
上將軍至開府儀同三司太子太師致仕宋祖卽位就西京賜  
器幣數日卒年七十五

張彥澤其先突厥部人自陰山徙太原爲人驍悍殘忍目睛黃  
而夜有光顧視如猛獸以善射爲騎將數從莊宗明宗戰伐與

晉高祖連姻爲護聖右廂都指揮使領曹州刺史與討范延光拜鎮國軍節度使歲中徙鎮彰義爲政暴虐常怒其子數加笞辱子懼逃齊州捕送京師彥澤上章請殺之掌書記張式不肯爲作奏怒引弓射式走而免左右因共譏式且迫之去奔邠州節度使李周以問詔流式商州彥澤遣司馬鄭元昭詣闕論請且曰若不得式患在不測高祖不得已與之乃剖心決口斷手足而死式父鐸詣闕訴冤高祖遣王周代彥澤以爲右武衛大將軍周奏彥澤不法二十六條并述溼人殘敝之狀諫議大夫鄭受益曹國珍刑部郎中李絳張麟員外麻濤王禧伏閣疏論殺式之冤上語以彥澤功臣吾嘗許其不死濤等厲聲曰彥澤罪若可容延光鐵券何在高祖不得已削彥澤勳爵官鐸并弟守貞子希範等下詔蠲溼民賦稅免雜役一年出帝時起爲左

龍武大將軍遷右武衛上將軍至右神武統軍自與契丹戰河

北嘗在兵間數立功拜彰國軍節度使與戰陽城晉師方列拒

馬爲行砦契丹圍之

語在藥元福傳

彥澤卽拔拒馬力戰契丹奔北二

十餘里追至衛村又大敗之契丹遁去開運三年爲馬軍都排

陣使往來鎮定之間嘗爲先鋒至中渡橋已爲賊所據力戰爭

之敵小却乃夾河而寨因重威守貞叛彥澤亦降德光遣與傅

住兒以二千騎先入京師彥澤倍道疾驅至河街枚夜渡壬申

夜五鼓自封丘門斬關而入大內都點檢康福全宿衛寬仁門

彥澤呼而下之傅德光與皇太后書入遂頓兵明德樓前遣在

兒傅德光宣語帝脫黃袍素服再拜受命使人召彥澤謝曰臣

無面目見陛下明日遷帝于開封府太后皇后得乘肩輿與宮嬪

宦者十餘人皆步從以兵監守內外不通帝與太后所上德光

表章皆先示彥澤乃敢遣自以有功契丹晝夜酣飲出入騎從嘗數百人題其旗幟曰赤心爲主迫遷出帝輩內庫多輸私第又縱軍士大掠京師凡遷獲罪人彥澤醉不能問出三手指軍士卽驅出斷其腰領皇子延煦母楚國夫人丁氏有色使人求於太后遲疑未與卽劫取之與閭門使高勳有隙乘醉入其家殺數人而去德光入京問之亦怒命鎔之會勳與都人爭投狀疏其惡乃令勳蒞殺彥澤所殘士大夫子孫皆絃絃杖哭隨而詣誓以杖朴之俛首無一言行至北市斷腕出鎔然後用刀勳剖其心祭死者市爭破腦取髓鬻其肉食之。

皇甫超真定人爲人有勇力虬髯善射少從明宗征伐爲武勝軍節度使所至苛暴以誅斂爲務賓佐多解官逃去以避其禍晉高祖時歷義武昭義建雄河陽四鎮罷爲神武統軍契丹入

寇陷貝州以爲馬軍右廂排陣使楊光遠及遇分兵守鄆至馬家渡契丹將渡河以助光遠遇擊敗之以功拜義成軍節度馬軍都指揮使開運二年契丹寇西山遣先鋒趙延壽圍鎮州杜重威不敢出延壽分兵大掠破藥城栢鄉等九縣南至邢州出帝遣與張從恩會馬全節安審琦禦之從恩等至相州陣安陽遭遇與慕容彥超率數千騎直前視賊渡漳河遂敵數萬轉戰十餘里至榆林爲敵所圍遇馬中箭而墜得其僕杜知敏馬乘之以戰知敏竟爲敵擒復入取之自午至未解而復合敵益出生兵勢轉盛或勸彥超走遇曰戰或可生走則必死且無以報國從恩惟遇無報皆謂已陷旣而報至審琦率兵赴之諸軍皆從而北賊望見救至卽解去遂收兵而南是時契丹人馬俱乏而將不能追從恩率遇等退保黎陽賊得從容解去三年冬重

威復爲都招討。遇爲馬軍右廂都指揮。屯子中渡。聞重威已降。衆咸胎愕。不能對。因出降。表遇等俛首以次自誓。其名遂應。兵解甲出降。契丹遣與張彥澤入京。行至平棘。絕吭而死。議者責其不能於脅降時奮起以殺重威。故不得爲義烈。而與亡人之國者同也。

冊曰：數啓匹夫。禍成三叛。一言典亂。此爲至驗。重鎮強兵。繫於一旦。衆思欲食。已付成算。有人心者。不若是誕。三復嘆傷曰：桑維翰。

弘簡錄卷八十一

明刑部員外郎仁和弘齋邵經邦學

皇清翰林院侍講學士四世孫遠平校閱

載記 五代漢一

高祖劉知遠 隱帝劉承祐

高祖皇帝姓劉氏名知遠其先沙陀部人後居太原爲人嚴重寡言弱不好弄面紫睛白視之凜如與晉祖俱事明宗戰于德勝晉祖馬甲斷梁兵幾及承授以已所乘馬復取晉祖馬殿而還由是德之留守北京以爲押衙從入朝遇愍帝出奔止衙州傳舍晉祖與帝議事未決左右欲兵之知遠遣勇士石敢袖鐵鉞擁護晉祖得免敢竟與格鬪而死遂率兵盡殺愍帝左右而去晉祖將舉兵密爲謀畫贊成其事卽位以佐命功擢侍衛親

軍都虞候領保義軍節度使耶律德光送晉祖至潞州臨別指  
曰此都軍甚操剽俗謂勇猛無故勿棄之天福三年遷侍衛馬步軍  
都指揮使改領忠武軍已而用杜重威領忠武徙知遠歸德軍  
恥與降將同柵杜門不出晉祖怒欲罷其兵宰相趙瑩不可遣  
和凝就第宣諭始受命五年徙鄴都留守九月朝京師晉祖幸  
其第六年兼領河東改北京留守出帝立嘗疑知遠勳位已高  
每優尊之拜中書令封太原郡王幽州道行營招討使又陞北  
面行營都統開運二年四月進封北平王三年五月加守太尉  
已實未嘗出兵契丹寇澶州別遣備王攻鴈門敗之于秀容八  
月殺吐渾白永福等族取其貨鉅萬良馬數千出帝已遷遣牙  
將王峻奉表契丹德光呼之爲兒賜以木枋其法貴此如中朝  
凡杖非大臣不可得峻持枋歸幽人望之皆避道還言契丹必



不能久居乃議建國二月戊辰司馬張彥威等上疏勸進辛未  
卽皇帝位仍稱天福十二年時天下無主來歸者衆相州賊首  
梁暉武節都指揮史弘肇取代州殺其刺史王暉晉州將藥可  
儔殺其守將駱從期及括錢使趙熙陝州留後趙暉潞州留後  
王守恩丹州指揮高彥詢皆來歸三月丙戌朔獨河東雜稅辛  
卯延州軍亂逐節度使周密壬寅契丹聞漢起逐去四月己未  
以都押衙楊邠爲樞密使都孔目郭威副之史弘肇侍衛親軍  
步軍都指揮使契丹陷相州殺梁暉癸亥立夫人李氏爲皇后  
甲子以判官蘇逢吉推官蘇禹珪並爲中書侍郎同平章事乙  
丑弘肇取潞州戊辰奉國指揮武行德以河陽來歸弘肇取澤  
州丙子契丹入鎮州五月甲午以太原尹劉崇留守北京丙申  
如東京宣武僞節度蕭翰遜歸立邠國公李從益知南朝軍國

事戊申次絳州刺史李從嗣來歸六月丙辰次河陽殺從益及其母于京師甲子至自太原戊辰收國號漢赦罪人蠲民稅閏七月乙丑禁造契丹服器杜重威反以高行周爲鄴都行營都部署討之庚辰追尊四代祖考爲皇帝妣爲皇后高祖湍益明元廟號文祖妣李氏明貞曾祖昂諡恭僖廟號德祖妣楊氏恭惠祖俱諡昭憲廟號翼祖妣李氏昭穆考瑛諡章聖廟號顯祖妣安氏章懿以漢高帝爲始祖光武爲世祖八月獲聖指押白再築逐契丹以鎮州來歸丙申安國軍節度使薛懷讓殺契丹將劉錡入于邢州九月丙戌以竇貞固守司空兼門下侍郎李壽爲中書侍郎兼同平章事庚辰北征十月甲申次常城赦河北十一月壬申杜重威降十二月癸巳至自鄴都改元

乾祐元年正月己未更名壽時帝不豫適長子承訓薨悲哀增

劇乃以次子承祐屬郭威史弘肇楊邠趙逢吉等時尚未封王  
逢吉請亟封之丁丑帝崩年五十祕不發喪二月辛巳封承祐  
周王是日卽位柩前癸巳大赦不改元諡帝曰睿文聖武昭肅  
皇帝崩號太祖三月壬戌以竇貞固爲山陵使吏部侍郎段希  
堯副之太常卿張貽爲禮儀使兵部侍郎盧價爲鹵簿使御史  
中丞邊蔚爲儀仗使丁丑李鴻罷四月辛巳楊邠爲中書侍郎  
兼吏部尚書同平章事郭威爲樞密使改鎮寧軍節度郭從義  
爲承興軍兵馬都部署保義軍節度白文珂爲河中兵馬都部  
署五月河決原武又決滑州京畿旱鵲食蝗七月戊申朔彰  
德軍節度王繼弘殺其判官張易庚申加郭威同平章事癸亥  
契丹鄭州刺史王彥徽來奔庚午殺成德軍副使張勳八月壬  
午命郭威討李守貞等九月西面行營都虞候尚弘遷及趙思

緡戰敗績十一月甲寅殺太子太傅李崧滅其族壬申葬壽陵  
在河南告城縣十二月己卯彰武軍節度高允權殺致仕太子太師劉  
景巖回鶻吐蕃俱遣使來

隱帝二年正月乙巳朔赦囚二月丙子蠲民紐配租五月守貞  
將周光遜降乙丑趙思綰降殺之六月蝗七月甲子克河中守  
貞自焚死八月郭從義殺前承興巡檢喬守溫丙戌郭威使來  
獻俘十月契丹寇趙魏又陷內丘羣臣進添都馬已丑郭威及  
王峻伐契丹十一月契丹遜是歲京師大風拔木壞城門宮中  
數見怪物投瓦石撼門扉 三年正月西面行營都部署趙暉  
克鳳翔景崇自焚死二月甲戌旌表潁州汝陰民趨溫門閭三  
月己酉寒食望祭于南御園四月壬午郭威爲天雄軍節度使  
六月癸卯河決原武八月達鞠來附十一月丙子殺楊邠史弘

肇及三司使王章皆滅其族。丁丑，郭威起兵，義成軍節度宋廷  
渥叛附之。壬午，威至封丘，泰寧軍節度慕容彥超軍于七里店。  
癸未，勞軍于北郊。甲申，勞軍于劉子陂。彥超及威戰，敗績。開封  
尹侯益降乙酉。郭允明弑帝。年二十。蘇逢吉等皆伏誅。釁亡。

冊曰：晉漢迭興，草創無名。事多忽畧，何足論評。君身如寄，  
臣跡若萍。臨朝嗣立，類匪真誠。直書漢滅，以破奸萌。

載記 五代漢二

高祖后李氏

從子贊

從弟信

高祖后李氏，晉陽人。本農家。女少爲軍卒時牧馬。晉陽夜入其  
家，劫取之。已貴，封魏國夫人。生隱帝。太原起兵，議賞軍卒帑藏，  
不足欲歛於民。后諫曰：方今起事，號爲義兵。民未知惠而先奪  
其財，殆非所以救民之意。凡官舍所有，請悉出之。雖少不足士  
不怨。高祖改容謝之。卽位立爲皇后。隱帝立，冊爲皇太后。時帝

年少數與小人郭允明等遊戲后數切責之帝以國家之事非所宜言張昭問之上疏諫帝請親近師傅延問正人以開聰明帝益不省允明等謀誅大臣帝入白太后深以爲不可曰此大事當與宰相議之李業從旁對曰先帝平生言朝廷大事勿問書生帝拂衣而去已而邠等死周祖起兵嚮京師慕容彥超敗於劉子陵帝欲自出臨兵太后止之曰郭威本吾家人非甚危疑何肯至此今若按兵無動以詔諭威威必有說則君臣之際庶幾尚全帝不從遂及於難周祖入京舉事皆稱太后誥奉以爲母請出臨朝后感見待深意涕泗橫流已而遷太平宮上尊號曰昭聖皇太后顯德元年春崩

高祖三子長承訓早喪追封魏王次隱帝次承勳有疾爲開封尹復愛弟崇子贊以爲子乾祐元年除徐州節度使周祖入京

意漢大臣必相推戴及見馮道等殊無意不得已見道下拜道  
受拜如平時徐勞之曰公行良苦周祖意色皆沮難於自立因  
白太后擇立漢嗣皆言承勳宜立太后命以卧榻昇出乃共奏  
贊高祖鍾愛宜立爲嗣遣馮道率羣臣迎之道揣周祖意不在  
贊請曰公此舉由衷乎祖指天爲誓道遂亟往見贊贊曰此來  
所恃者公三十年舊相是以不疑行至宋州聞衆兵已擁周主  
還王峻遣郭崇以兵七百衛贊贊問崇所以來意崇曰澶州軍  
變惟有未察遣崇護衛非有他也贊乃名崇登樓相見已而周  
祖以書名道先歸留其副趙上交王度奉贊入朝贊客將買正  
等欲圖道贊戒以勿草草事豈出于此公道已去崇始幽贊外  
館殺買正及判官董裔都虞候劉福孔目夏昭度等周祖已監  
國太后下詔授贊開府儀同三司檢校太師上柱國封湘陰公

以幽死贊初以都押牙鞏廷美教練使楊溫守徐州至是聞贊  
不得立乃閉城拒命周祖拜王彥超徐州節度使以兵克之皆  
見殺承勲疾卒追封陳王 高祖從弟信初爲典捷軍都指揮  
使領義成軍節度使徙許州隱帝立楊邠等不欲信在京師乃  
遣就鎮信涕泣而去所至贖貨好殺邠等死信大喜已而聞難  
作憂不能食遂自殺追封蔡王

載記 五代漢三

蘇逢吉 竇貞固 慕容彥超 藥元福 唐景思

劉詞 王景崇 趙思紹 史弘肇 楊邠

王章 劉銖 李業兄洪信 洪義 聶文進後贊邠 九章

蘇逢吉長安人父悅爲高祖從事常命代作奏記高祖稱之得  
名見精神爽秀卽授節度判官高祖性剛嚴賓佐稀得見獨逢



吉終日侍立又兩使文簿盈積書閣莫敢通達吉輒取愷之伺  
高祖色善時以進多所允可以故甚愛之然爲人貪詐無行事  
殺戮祖嘗以生日遣訊囚祈福謂之靜獄願無輕重曲直悉殺  
之報曰獄靜矣及建號擢居相位時制度草創朝廷大事出其  
意見素不學問隨事裁決以故漢世尤無法度不施德政民莫  
稱焉與蘇禹珪同相除吏多違舊制在廷事皆關決逢吉禹珪  
充位而已尤好納貨市權謗者謹譱以上方倚信二人莫敢告  
者鳳翔李承吉故秦王從驥子以求玉帶不與前客省使王筠  
使楚還意得重賂先皆許以一州後咸不與晉相李崧從契丹  
北漢祖賜以崧第其別產田地在西京者併取之崧自北還因  
以宅券獻逢吉不悅乃誘人告與其弟異等并家僮二十人謀  
囚山陵爲亂又改二十爲五十坐以族時囚多盜詔增本家及

鄰保皆族誅或言古法所無逢吉翁恡以爲是但去鄰保二字於是跡捕者爭爲苛剋殺人滋濫聊州張令柔盡殺平陰縣民十七村衛州葉仁魯擒盜悉斷脚根宛轉號呼累日始絕聞者不勝其寃逢吉已貴益恣意放縱至不服繼母喪妻武氏殞諷百官諸鎮皆輸贈賻諸子服未期除爲官怒庶兄外來未白而見託以他事杖殺之性喜使酒嘗從征鄰辱周祖於軍中同列會飲切齒醜詆又諷李濤請罷周祖兵柄太后怒罷濤相乾祐二年加司空弘肇被誅命權知樞密院方草麻聞周祖兵起是夕宿金祥殿東閣口未曉見李崧在側明日與隱帝走趙村自殺周祖梟其首正當崧所被刑之處

竇貞固字體仁同州白水人後唐諫議大夫專子幼能屬文登同光進士調萬全主簿內艱服除授河東節度推官爲人持重

寡言綽有特望晉祖在藩重其廉介卽位擢戶部員外郎翰林  
學士中書舍人天福三年應詔上疏言爲國之要進賢是先陛  
下方樹丕基宜求多士乞降詔百僚人各議定有何才能堪任  
何職朝廷依奏用之若果能符薦引所奏之官與同獎賞如乖  
其舉或洩徇私亟加殿罰如此官由德序位以才升晉祖嘉納  
命所司著爲令明年改御史中丞與太常卿崔胤侍郎呂琦張  
允同詳定正冬朔會禮節并樂章及二舞行列歷刑部門下二  
侍郎少帝拜禮刑工三部尚書知貢舉擇士平允時論稱之與  
漢祖同事晉主相得其權及入汴與尚書王崧率百官見于桀  
陽西漢祖駐駕勞問久之會建議宗廟從其請立高曾祖禰爲  
四親廟更立始祖廟於四廟之外並尊高帝光武識者咸謂漢  
祖本起晉陽親皆匹庶徒以同姓一旦上合高光失之彌遠多

以爲非俄遷吏部尚書逢吉禹珪自霸府僚驟居相位思得舊臣乃擢居首相兼弘文館大學士隱帝改貞固本貫永安鄉爲賢相鄉班瑞里爲勳貴里貞固務以端靖自持楊史樹黨恣橫不能有所規救及敗自詣周祖稱太后制委與禹珪王峻同權軍國政事登極加兼侍中馮道任首相改監脩國史俄罷守司徒封沂國公世宗卽位歸洛陽宋初赴闕詣范質求任東宮三少質不爲奏開寶二年卒年七十八

慕容彥超漢高祖同產弟嘗居吐谷渾部冒姓閻氏黑色卷髯多智詐號閻崑崙少事明宗爲軍校累遷刺史唐晉之間歷磁單濮棣四州坐濮州造麴受賕法當死漢祖上章諭救得減流于房州起兵時逃歸拜鎮寧軍節度使命副高行周討杜重威謀議多不協行周務持重兵至城下久之不進彥超欲連戰不

許揚言行周有女妹重威子以故惜賊不攻行周大怒高祖聞之懼有他變下詔親征又數以事凌辱行周至不能忍見宰相涕泣自訴高祖知曲在彥超遣人慰勞行周召彥超責之又遣詣行周謝過意方稍解時重威益堅守諸將皆知未可圖方向其隙而彥超獨言可速攻高祖以爲然因自督士卒死傷者萬餘由是不敢復言後重威出降高祖以行周鎮天雄軍而徙彥超鎮秦寧隱帝遣人殺郭威王峻等懼事不果召諸將入衛京師使者至究彥超方食釋匕箸而就道周兵犯京師開封尹侯益謂隱帝曰北兵之來其家屬皆在京師宜閉門以挫其銳遣其妻子登陴招之可使解甲彥超請益曰此懦夫之計也隱帝乃遣彥超副益將兵于北郊周兵至益乃叛降獨彥超力戰于七里店太后使人告以善加防衛大言報曰北兵何能爲當於

陣上鳴使歸營又語隱帝官家宮中無事可出觀臣戰明日隱  
帝出勞軍彥超戰敗奔兗帝遂遇弒周太祖入立心不自安數  
有所獻報以玉帶仍賜詔書以安慰之呼爲弟而不名又遣翰  
林學士魚崇諒往諭心益疑懼已而劉晏自立于太原出兵攻  
晉絳彥超乘間亦謀反判官崔周度諫曰魯詩書之國白伯禽  
以來咸以禮義守之而能長世今令公英武一代豪傑若能量  
力相時而動可以長保富貴李河中安襄陽杜令公近歲之龜  
鑑也彥超大怒未有以害之乃遣押衙鄭麟至京師求入朝太  
祖知其詐手詔許之復稱管內多盜而止又詐爲高行周所與  
書以進其辭皆斥指周過失若欲共反者太祖驗其印文假僞  
以示行周又遣人南結李昇出兵攻汴陽太祖乃遣侍衛步軍  
指揮使曹英客省使向訓討之彥超閉城自守因大括城中民

賞以犒軍前陝州司馬閔弘魯懼其鞭扑悉家貲以獻彥超以爲未盡并罪監括周度皆死是歲鎮星犯角亢占曰鄭分兗州當焉乃勉其城守者曰吾有銀數千錠當悉以賜汝軍士以其在鎮常置庫質錢有好民爲僞銀以質者因使教十餘人爲之皆以鐵爲質而包以銀號鉄胎銀私相謂曰此鉄胎爾復何用哉皆不爲之用明年五月太祖親征城破夫妻皆投井死其子繼勲率其徒五百出奔被擒遂滅其族詔贈弘魯左驍衛大將軍周度祕書監

藥元福晉陽人幼有膽量善騎射初事邢帥王檀以勇敢聞後唐爲拱衛威和親從馬鬪軍都校太平軍內外馬軍都指揮使晉天福中爲深州刺史開運初少帝駑澶淵契丹圍魏郡陣於城北元福領兵居陣東偏澶民馬破龍告契丹先攻其東卽浮

樂可奪契丹信之盡銳來戰元福與慕容鄴各領二百騎爲一隊躍出奮鐵搥擊斃契丹數人左右馳突無不破靡契丹兵潰少帝登城望見名撫之曰古之忠烈無以過也明年契丹復入晉師列方陣契丹以奇兵出陣後斷糧道晉軍乏水軍中饑渴已甚值順風揚塵諸將皆謂彼勢甚銳俟風反與戰元福謂若俟風反吾屬必鹵宜出不意彼謂我不能逆風以戰此兵家之奇也乃率麾下竟出諸將繼至契丹大敗追北二十餘里殺獲甚衆擢爲威州刺史會蕃部三族酋長拓拔彥超石存乜厮襲共謀爲亂詔元福將行營騎兵與馮暉進討威州距朔七百里無水草號爲旱海行至耀德食盡鹵知我軍饑渴邀我於險引衆數萬布爲三陣以待暉軍大懼遣人賂以金帛求和彥超許之使者往復數四至日中列陣如故元福謂是不可信祇欲困



我遷延至暮。則吾黨成禽矣。暉驚曰。奈何。元福曰。賊雖衆而精。兵絕少。獨依西山爲陣。餘不足患。請以麾下騎先擊西山。兵公但嚴陣不動。俟敵少却。當舉黃旗爲號。合勢進擊。暉然其策。彥超大敗。橫尸蔽野。詔與暉各賜襲衣金帶。緡帛銀器。漢乾祐中。從趙暉討王景崇。蜀兵數萬來援。衆寡不敵。漢軍少却。元福領數百騎自後驅之。令曰。敢還顧者斬。衆殊死戰。大敗蜀兵。追至大散關。殺二千餘人。餘皆棄甲遁去。以功遷滑州刺史。周廣順初。從王彥超討徐州叛將楊溫。克之。改陳州防禦使。從王峻討劉崇。爲北面都排陣使。明年調兵戍晉州。命率所部入朝。賜六銖袍帶鞍馬器仗。以拔慕容彥超功。授建雄軍節度使。世宗高平之戰。劉崇敗走。縱兵圍太原。改節度同州。充太原四面壕砦都部署。師還。加檢校太尉。移鎮陝州。又歷定。盧。曹三鎮。宋初。加

檢校太師卒年七十七贈侍中

唐景思秦州人。幼屠狗爲生。後去爲軍卒。善角觝事。蜀遷指揮使。唐兵來伐。景思守固鎮。以城降。拜興州刺史。晉高祖時爲貝州行軍司馬。契丹攻陷。爲趙延壽所得。滅晉。拜亳州防禦使。漢高祖時。轉鄧州司馬。至公淮。巡檢使。史弘肇用事。有奴因所來。不遂。馳上變言。與李景交通。私畜兵甲。弘肇遣吏收捕。惟有錢十千。甲一屬。乃鞠奴具伏。而釋景思。後從世宗戰高平。以所得漢降兵數千爲效順。指揮屬爲指揮使。復戍淮上。周師伐淮南。以功領饒州刺史。兵攻濠州。力戰傷重。卒。贈武清軍節度使。劉詞字好謙。元城人。少事楊師厚。以勇悍知名。梁唐戰夾河。詞屢立功。爲効節軍使。遷長劍指揮使。坐事左遷汝州。十餘年。廢帝時爲禁軍校。從破張從賓。楊光遠。以功遷奉國第一軍都虞

候又從馬全節破安州遷指揮使從杜重威破鎮州以先登功拜泌州刺史爲襄州行營都虞候討安從進遷泌州團練使徙房州歲餘爲政不苛隸人頗便之卧起常被甲枕戈謂人曰我以此取富貴豈可一日忘之且人情易習若惰其筋力有事何以報國漢高祖時歷奉國右廂侍衛步軍都指揮使又領寧江軍節度使行營都虞候以討李守貞功轉節度鎮國軍周祖入立加同中書門下平章事歷鎮安國河陽三城高平之戍樊愛能等軍敗南走遇詞止之曰軍敗矣可無前也詞不聽輒趣兵以進世宗嘉之以爲隨駕都部署班師改河東行營副都部署徙鎮采輿卒年六十五贈侍中諡忠惠

王景崇邢州人素性明敏巧辯善事人明宗鎮邢州以爲牙將卽位拜通事舍人歷引進閣門使事晉累拜左金吾衛大將軍

管憤人主不能盡用晉亡厚賂蕭翰將高牟翰以求進不果而許王從益用爲宣徽使監左藏庫漢高祖起取庫金奔迎至京師拜右衛大將軍未之奇也高祖攻鄴復不得從乃求留守起居表謁見行宮願留軍中效用爲畫攻戰之策甚有辭辯高祖乃奇其材時漢方新造回鹘將入貢言爲党項所隔不得通願得兵爲援詔遣往迎將行戒之曰鳳翔侯益永興趙贊皆受命契丹內顧白疑嘗陰名蜀人爲助今聞被鄴咸懼請入朝如其已來善矣若有遲疑則以便宜圖之景崇行至陝遇贊已東面所名蜀兵已據子午谷寇南山景崇擊破之追至大散關而還詔兼鳳翔巡檢使旣至益尚未有行意而高祖崩或勸可速誅益景崇念獨受命先帝少至莫知猶豫未決益乃亡至京師厚賂史弘肇楊邠等陰以事中景崇心不自安諷鳳翔將吏求已

領府事朝命授以邠州留後而用趙暉為鳳翔節度使景崇懼  
乃叛盡殺侯益家屬愍帝命暉討之景崇西招蜀人為助至寶  
鶴為暉將藥元福李彥從所敗暉擊固鳳翔救挑戰不出乃先  
設伏以待令千人潛之城南一舍偽為蜀救兵至旗幟循南山  
而下景崇以為然率數千人潰圍而出遂大敗由是不敢復出  
時守貞思綰皆敗門下客周彥勸其速降猶欲為僥倖萬一之  
計以暉精兵皆在城北使公孫肇等燒城東門偽降而以牙兵  
擊其城北脫或不戍而死猶勝於束手也彥等皆然之遲明肇  
燒東門降暉府中火起景崇遂自焚

趙思綰魏州人初為趙贊河中牙將及徙永興亦從入朝留兵  
數百人從思綰於鎮王景崇與齊藏珍以兵迎回鶻至永興用  
思綰兵擊走蜀人然以非己兵懼思綰等有貳心意欲黥其面

以自隨而難言之乃稍微風其旨思緒厲聲請先獻以率衆藏  
珍勸殺之不聽適漢祖遣人名思緒等因懼死其下常彥卿語  
以事至變生乃與俱入城有州校坐於城門奪其佩刀斬之并  
斬門者十餘人遂閉門劫庫兵以叛漢祖遣郭從義王峻討之  
經年攻能下已而送款李守貞僞除晉昌軍節度使居數月城  
中食盡思緒計窮募人爲地道將走蜀其判官陳讓能勸以翻  
然效順率先自歸以功補過庶幾有生思緒然之乃遣教練使  
劉珪詣從義乞降而遣其將劉筠奉表朝廷拜思緒鎮國軍留  
後越使就鎮蜀陰遣人亦招思緒從義疑之遣人白於郭威威  
命圖之從義囚入城趣思緒上道至則擒之父子俱斬于市  
史弘肇字化元鄭州滎澤人爲人驍勇走及奔馬槩末以民兵  
預調後選爲禁兵隸漢高祖以爲軍校鎮太原使將武節左右

指揮領雷州刺史其爲將嚴毅寡言麾下小忤意立搥殺之軍中爲之股慄以故起義之初行兵所至秋毫無犯兩京帖然攻破代州王暉以功拜忠武軍節度使侍衛步軍都指揮使擊契丹耿崇美於潞州敗走之王守恩以城降而河陽武行德澤州翟令奇等皆迎弘肇自歸遂入河陽高祖從後至入京師遷侍衛親軍又兼馬步軍領歸德節度同平章事預受顧命立隱帝時關西用兵人情恐懼適太白晝見禁民仰觀京師訛言相驚罪無大小皆死孔目解暉恃狡酷因緣爲奸凡民抵罪吏以白弘肇但以三指示之吏卽腰斬至斷舌決口斫筋折足不以爲異李崧坐族誅弘肇取崧幼女爲婢前資故將失職之家姑息僮奴廝養往往屬制其主莫敢告訴燕人何福進遣僮以錢淮南鬻茶僮費筭之乃誣告福進以玉枕遺吳人捕治棄市帳下

利其財貨妻子悉分取之弘肇性不喜賓客嘗言文人難耐呼  
我爲卒自領歸德令副使等月奉私錢爲獻潁州場官趙溫與  
軍將陳拯爭官務訟之三司弘肇怒不先白追殺溫連坐者數  
十人周祖平李守貞推功拜中書令時帝頗近小人至太后故  
人親族託求軍職輒與邠等裁抑之帝始聽樂賜教坊使玉帶  
錦袍弘肇怒悉取還官周太祖出鎮魏州弘肇議帶樞密以行  
恨逢吉楊邠不合會飲寶貞固第厲聲舉爵曰安朝廷定禍亂  
直須長槍大劔若毛錐子安足用哉三司使王章曰無毛錐子  
軍賦何從集由是文武相爲水火帝遣王峻置酒公子亭和解  
之是時用事李業等皆不喜執政帝亦春秋漸長惡爲所制數  
有忿言業等乘間譖弘肇等威震人主不除必爲亂會禁中夜  
聞作坊鍛甲聲帝以爲兵至達旦不寐遂與業等密謀乾祐三



年冬十月十三日弘肇與邠章等入朝坐廣政殿東廡有甲士數十自內出擒斬三人并族其家帝召羣臣告以謀反皆莫敢對又召諸軍校告以吾今得爲汝主若弘肇等專權汝曹常憂橫死軍校咸呼萬歲周祖卽位追封弘肇鄭王以禮歸葬

楊邠魏州冠氏人少爲州掌籍吏租庸使孔謙補邠拘押官歷孟華鄆三州糧料院使事漢高祖爲右都押衙卽位拜樞密使本出小吏不喜文士與蘇逢吉等內相排忌嘗泣訴李太后前尋加邠中書侍郎兼吏部尚書同平章事肅草逢吉禹珪所爲事無大小必先示邠其言爲可方始入白凡門蔭出身諸司補吏者一切罷之意惟求長吏事而忽於大體謂爲國家者恒持帑廩實甲兵完禮樂文章乃虛器也以故乘大政而務苛細凡前資官不得居外天下行旅皆給過所然後得行旬日之間人

情大殺復度不可行而止嘗與王章論事帝前帝曰事行之後勿使有言邠遽曰陛下但禁聲有臣在聞者爲之戰慄帝欲立所愛耿夫人爲后又却之夫人死將以后禮葬又謂不可由是大怒左右乘間構之遂與弘肇等同見殺邠爲人頗儉靜四方賂遺雖不却未嘗敢私往往以資國用居家謝絕賓客晚節稍通緝紳延門下客課吏傳寫諸史傳記將以適用未幾及於禍周追封弘農郡王

王章魏州南樂人初爲州孔口事張令昭逐節度使劉延皓令昭敗婦翁白文珂與副招討李周善乃以章託周匿之楮中負以橐駝之洛陽藏第中唐滅始出爲河陽糧料使漢高祖典禁兵補章都孔口從鎮太原卽位拜三司使檢校太尉隱帝加太尉同平章事是時漢方新造百凡空乏關西討叛供饋軍旅未

符乏絕然征歛制下民不堪命往時租一碩輸者只耗二升章增至二斗緡錢出入舊八十爲百減至什三民訴田必令全覆以括其隱天下由此重困尤不喜文士嘗曰此輩與一把斧子未知顛倒何益於用凡給百官俸廩悉取供軍餘外不堪者命有司高估其價估定又增謂之權估意猶不滿往往復增之遇有犯鹽礬酒趙者無多寡皆抵死吏更緣之爲奸莫所控訴卒以見殺

劉銖陝州人少爲梁郃王牙將與漢高祖有舊從鎮太原授左都押衙爲人慤酷好殺高祖謂身斷類已特信用之卽位拜承典軍節度使徙鎮平盧加檢校太師同平章事兼侍中時江淮阻隔吳越遣使多泛海以通中國故濱海諸州皆置博易務與民貿易民有負失務吏擅自拘治不關州縣前此皆利其厚賂

悉縱不問民頗爲苦銖一切禁之在任用法深刻民有過犯輒問年幾何隨其年數杖之謂之隨年杖每杖一人必兩杖俱下謂之合歡杖又請增民租一畝出錢三十民不堪之將名還隱帝患其剛暴不至命沂州郭淮將禁兵駐青州始遣符彥卿往代銖跽跽莫敢有異意遂受代還京師嘗切齒弘肇與邠會周太祖兵起朝命誅郭威王峻等家屬銖盡屠滅之極其慘酷太祖入京銖與妻子俱兄執時太祖方欲收人心乃奏太后止殺銖與李業等梟首於市赦其妻子卽位與蘇逢吉各賜本處莊宅一區

李業太后弟諸兄洪信洪義等共七人洪信善騎射初隸後唐明宗帳下爲小校入晉授典廩左廂都指揮使漢祖鎮太原同領護聖左廂投岳州防禦使保義武信軍節度使侍衛馬軍都

指揮使業最幼后憐愛之以爲武德使隱帝卽位年幼業與聶文進後贊郭允明等前後狎昵多爲度所以相請戲宮中放紙鳶肆無顧憚太后數戒不聽時宜徽使關業欲得之太后遣人微諷郭與弘肇皆謂不可業由此怨望贊亦恨久不得是乃同謀殺郭等又遣供奉官孟業賫密詔令洪義殺澶州王殷護聖指揮郭崇往鄴害郭威洪義素怯懦是死不發反引業見殷殷以告郭威威遂舉兵反帝遣內養鶻脫視威所向威得之遣還附奏請縛業等送軍中隱帝得奏以罪業業言威反狀已白請悉誅京師家屬威至滑洪義就降業急請山府庫資軍禹珪猶曰未可業於帝前拜之曰相公但爲官家勿惜府庫詔下賜京師兵及魏兵從威南者人萬錢督其子弟作書懷之翌日兵敗業多取內庫金寶以奔其兄洪信不納走至絳爲人所殺周祖

以太后故加二兄同平章事移鎮京兆宋初遷洪信左驍衛上將軍洪義兼中書令移鎮鄜州卒各贈太師

聶文進并州人少爲軍卒善書算給事高祖從鎮太原爲押司官卽位領軍屯衛將軍樞密院承旨時周祖爲使頗親信之遷右領軍大將軍爲人恣橫居中用事謀殺楊邠郭威等夜作詔書制置中外黜閑兵籍指麾殺戮以爲己任時周祖在鄴初意文進不與及發詔書皆其手跡乃大詬之帝出禦后命以善衛猶對曰有臣在此百威何害是夜奉帝宿于七里店其徒尚飲酒歌呼自若明旦皆見殺後贊兗州瑕丘人其母本倡故幼善謳事張延朗死後更事高祖愛之以爲牙將卽位拜飛龍使隱帝尤幸之因殺楊邠等而悔贊與允明等番休侍帝不欲離左右恐言已短兵敗奔兗州執送京師梟首部允明少爲高祖厨

養任翰林茶酒使隱帝狎愛之壻橫無忌常使荆南高保融給  
使人步洲城內若爲攻取之狀以傾動之荆人恐遂邀厚賂而  
還遷飛龍使其殺楊邠之日無雲而昏霧雨如泣手刃諸子姓  
於朝堂西廡章好張貽肅血流逆注及隱帝敗北郊還至封丘  
門不得入走于趙村允明從後追弑帝于民舍後自殺

弘簡錄卷八十一

終

弘簡錄

卷八十一

七

五代史三